

丁文誠公奏稿

丁文誠公奏稿

卷之九目錄

侯工合龍摺

同治十一年二月二十六日

請撥閩省輪船酌籌經費摺

同治十一年三月二十九日

導衛濟運諸多格礙摺

同治十一年三月二十九日

導 旨保薦堪勝兩司各員摺

同治十一年五月三十日

侯工收支各款摺

同治十一年六月二十九日

侯工續籌款項免扣減平片

同日

改撥閩省第八號輪船片

同日

侯工民堰酌給津貼摺

同治十一年七月三十日

侯工三汛安瀾分別獎勵摺

同治十一年九月三十日

覆核水師口糧營制摺

同治十一年十月三十日

師船由粵管駕來東摺

同治十一年十月三十日

酌改船式片

同日

預籌來年漕運會勘挑河修隄摺

同治十一年十一月十五日

黃河穿運請復淮徐故道摺

同治十一年十一月二十八日

請加浙粵兩省中額摺

同治十一年十一月二十八日

保薦丁彥臣摺

同治十二年正月二十六日

查看河道城隍各工摺

同治十二年三月初八日

估修石佛新店運隄片

同日

南旺湖工請免攤徵片

同治十二年三月三十日

候工合龍摺

同治十一年二月二十六日

奏爲堵築侯家林決口遵



旨晝夜趕辦現在壩工業已合龍盤壓穩固恭摺馳陳仰
慰

聖懷事竊臣前將侯家林堵築事宜布置就緒擇日進占
緣由奏

聞在案本月初四日欽奉

諭旨節氣已過驚蟄爲時較迫該撫務當嚴督在工各員
晝夜興築竭力趕辦以期早日竣工其附近民堰並著嚴
飭各州縣一體修整以資捍衛等因欽此遵查壩工自正
月二十九日進占後臣每日至壩頭督視在壩各員弁認

眞工作二月初一日至初四日連日沈陰細雨土塘甚溼料土上壩未能迅速殊深焦灼幸初五日後天氣漸晴諸事順手前此催辦正雜各料物源源而來足敷應用臣卽嚴飭文武各員振刷精神自初七日起趕做夜工其正邊兩壩每日各成一占漸至深水飭令加工盤做不敢稍涉大意約計二日可成一占間有風大之日暫停夜工次日則開工倍早以補不足比金門漸次收窄大溜奔騰傾注埽前水勢日見淘深復飭添廂埽頭加壓大土使埽身愈蟄愈穩其引河工程因工繁費鉅臣飭調營勇挑辦又以爲時迫促恐兵勇不敷並令承挑文武委員添夫協助趕於合龍五日前完工以備及時開放復於引河頭迤西河

形坐灣之處另挑寬深龍鬚溝一道以期分掣溜勢二十
二日南北兩壩門占已成臣正飭各廂工委兵加土盤壓
並將所挖引河及龍鬚溝攔壩先後啟放二十三日巳刻
水勢忽向北奔注大溜立見平緩正壩卽於是時趕搶合
龍上壩土料較前倍形踴躍風日晴和人心鼓舞計竭一
晝夜之力均已追壓到底金門立卽閉氣其邊埽亦隨正
壩於二十四日合龍夾土壩亦一氣澆土行礮均已普律
堅實現仍嚴飭各該員將正邊兩壩加壓重土並將後餞
迅速澆成格外幫寬以資得力查該處口門地勢旣屬較
低正河又已奪溜築壩挑河同時並舉爲時已晚實覺有
趕辦不及之勢幸賴

聖謨廣運指示周詳臣得有遵循黽勉從事計自興工以來天氣多屬晴霽水勢未甚漲發故辦理雖極煩重尙不十分棘手此皆仰託

聖主如天之福神祇効靈因得順軌安流保全湖河運道卽在工力役人民等感沐

皇仁軫念災區無不爭先趨事而署漕臣布政使文彬前署布政使李元華力籌鉅款至數十餘萬之多皆能及時接濟毫無短絀河臣喬松年派來文武各員弁能殫精竭力埽除河工積習各矢慎勤而揀調之廂工委兵尤爲十分用命其在工一切執事人員亦均勤慎將事用能集羣力而成大功至購運料物分派十數州縣時迫料多實形

繁重乃一月以來運送絡繹於途俾要工應手足用毫無延誤各牧令及各該紳民等實已筋疲力盡臣慶幸之餘復痛念民力之既竭也伏查此次大工自派辦料物以至興工爲時僅及一月自進占以至合龍僅二十五日其能如是之迅速實非微臣夢想所敢及所有在工首先出力之布政使文彬前署布政使按察使李元華等均請交部從優議敘其餘在工文武各員弁應由臣開單請旨破格優獎至在事出力各員紳等俟善後事宜妥辦完竣容臣確查擇尤奏請

恩施所有侯家林決口堵築合龍並遵

旨破格保獎各緣由恭摺由驛六百里馳陳伏乞

皇太后

皇上聖鑒訓示謹

奏

請撥閩省輪船酌籌經費摺

同治十一年三月二十九日

奏爲請撥閩省新製輪船赴東巡緝並酌籌經費以重海防恭摺仰祈

聖鑒事竊前准總理各國事務衙門會同戶部議覆福州將軍文煜等奏續造輪船應如何分派各省一片以閩局製造輪船原爲備物制用亟應分布海口以期熟悉風沙如廣東山東奉天等省均屬海道可通若撥用閩省船隻既可節閩局薪糧且不致以有用之船置之無用應令各督撫體察情形分別奏咨撥往應用所需薪糧各費准由各省洋藥釐金項下就近動支等因於同治十年十一月初六日奏奉

諭旨依議欽此咨行到前署撫臣文彬轉行藩臬兩司並
東海關監督籌議稟覆在案臣伏查東省海道縣亘三千
餘里洋面遼闊港汊分歧登郡尤爲天津咽喉巡防護漕
在在均關緊要上年臣以登州水師廢弛日久力求整頓
酌議變通營制製造師船以期有備無患業經臚列條款
奏蒙

諭旨交部議奏一面先行籌款委員赴粵查看船隻式樣
購覓料物隨時具稟核辦竊維前請購製拖船原爲內
洋操防之用以立水師根本若再加輪船出洋梭織巡哨
防範尤爲周密且閩局成船日多經費浩大自當各省分
撥以維大局惟所需經費惟由洋藥釐金動支查文煜原

奏聲明現成大號輪船三隻小號輪船兩隻每月需銀九千餘兩東省所轄皆係大洋必須大號輪船方能適用其每隻所用舵工水手弁兵以及管船官弁並應用煤炭一切需費若干原摺並未分晰聲敘臣亦礙難懸揣約計每月總在二千兩上下每年即需銀二萬數千餘兩再加以歲修經費合計不下三萬餘兩而東省所收洋藥釐金正稅居多自立關以來奏定章程洋藥正稅均歸入洋稅項下按結開報統入進出口各貨正稅分四六成動支四成解天津機器局應用六成奏撥京協各饗以及該關一切坐支每年均無贏餘其釐金一項每年所收綜計不過七八千金均係湊解饗項即以按年全數撥歸輪船薪糧不

敷甚鉅臣與在省司道及東海關監督再四籌商惟有將所收洋藥釐金一款專作為輪船經費此外不敷之項再由藩運兩庫於巡防緝捕經費生息項下移緩就急湊撥接濟再有不敷隨時籌款辦理總不得動用正款至釐金正稅應撥京餉並天津機器局經費仍分別照舊按成如數分解不准短少惟此項經費臣係就閩省所奏九千餘兩之數約略核計其必需口糧薪水實在用數未能卽定應俟咨取閩省所定各船經費章程來東詳細核明實用數目再行奏明核辦至於歲修之需此時更難懸定亦應俟輪船到東試用一半年後臨時酌核情形籌議至臣傳聞閩局製成輪船有名曰安瀾於東省洋面較為適用相

應請

旨飭令閩省督撫船政大臣迅卽分撥大號安瀾輪船一隻配齊舵工水手委員駕駛至東省煙臺停泊應用抑臣更有請者輪船舵工水手東省現在本無熟諳之人茲既撥用自應就該船現用人數駕駛方期得用其需用官弁兵丁管理操防等事東省本有水師自應俟船隻到東由臣自行遴選派撥並令其逐漸練習不必再用閩省弁兵庶期易於駕馭而東省習久技熟始可收輪船之益至該船既歸東海巡防應卽就近歸海關監督鈐束差遣以一事權而資稽查除分咨總理各國事務衙門暨閩浙督撫船政大臣查照並咨取原定一切經費章程酌核辦理外

所有請撥閩省新製輪船赴東巡哨並酌籌經費緣由理
合恭摺具奏伏乞

皇太后

皇上聖鑒訓示謹

奏

導衛濟運諸多格礙摺

同治十一年三月二十九日

奏爲遵

旨勘明導衛濟運諸多格礙縷陳實在情形恭摺仰祈

聖鑒事竊

臣

於同治十年十二月十三日承准軍機大臣

字寄奉

上諭蘇鳳文奏擬導衛水濟運於臨清衛河入運及張秋清黃相接之處各建一閘俟漕船將屆渡黃蓄高衛水使之南行並挑深河道增培隄岸由安山入鹽河至漁山上駛以達張秋可免繞坡渡黃之險等語著喬松年丁寶楨文彬各派幹員前往詳細查勘會商蘇鳳文妥速辦理欽此欽遵飭令運河道趕緊勘估一面將淤壅運河飭屬疏

濬並經河臣喬松年將清黃相接之處建閘難於擇地因黃水緩急無定有時勢猛必將閘座衝損勢弱去閘較遠又置於無用之地其由安山入鹽河至漁山一節亦須視水勢爲權衡臨時酌辦各情形先行奏

聞在案茲轉據運河道王化堂稟稱遵卽委員分赴沿河周勘查得運衛合流在甄板閘外閘東爲運閘西爲衛如欲建閘須在衛水北流之處相近甄板閘閘使之折而南下今量該閘河身實高於衛五尺迤南則節節更高愈趨愈仰詢之土人上年衛河漲發幾與兩岸相平爲數十年所僅有而分流入運亦僅達十餘里此其地勢低昂可見查運河上至張秋遷高十丈有奇如欲倒灌至張須二百

里閘河一律興挑深闊使運低於衛南低於北始能滔滔
奔注其修建閘壩又須在上流築打數丈攔壩掣乾河身
俟建造灰石瞭乾方能啟放現值春水發生再至伏秋汛
河面三四十丈勢極汪洋羈頭堵截兩岸單薄民隄難免
無潰決之患且衛河盛漲入運尙慮其水漫衝而以二丈
餘閘門宣洩不及汎濫橫行民舍恐盡遺漂沒况直東豫
三省以衛河爲水路通衢因建閘而截斷下游臨清關稅
館陶釐金旣無所出直省轉運軍械米船亦皆梗阻似非
疏運之道至東阿境里聯橋舊石打撈受淤已久起出亦
恐難合用等情請奏前來

臣伏查衛河入運之處建閘蓄
水必須上下游河身高低不甚懸殊水勢乃能暢注今運

高於衛就建閘處河身較量已及五尺迤南至張秋則節節高仰幾及十丈有奇無論挑挖不能如此之深即使一律挑深而遇衛水盛漲時閘門宣洩不及汎濫橫行不惟民舍被淹恐運道更加衝壞况既經建閘當衛水勢弱之時必將閉閘蓄蓄而衛之下游爲長蘆鹽運及臨清關稅要道其勢斷難停止至清黃相接之處建閘則誠有如喬松年所奏黃水緩急無定勢猛必衝壞閘座勢弱則相去較遠閘亦無用臣細查情形建閘之議實屬滯礙難行總之運河之病其病在於黃水穿運故黃水不治而但施功於運終無善策如建閘築壩蓄衛挑河各事果能一勞永利亦孰敢畏難苟安所慮鉅款虛糜於河道漕運仍無把

握自未便稍事遷就轉致貽誤謹將臨清建閘導衛濟運
諸多格礙緣由會同河東河道督臣喬松年合詞恭摺具
奏除咨漕臣查照外伏乞

皇太后

皇上聖鑒謹

奏

遵 旨保薦堪勝兩司各員摺

同治十一年五月三十日

奏爲遵

旨密保堪勝兩司各員出具考語分析臚陳才具恭摺仰

祈

聖鑒事竊 臣於同治十年十一月十九日承准軍機大臣

字寄同治十年十一月初三日奉

上諭爲政首在得人各省藩臬兩司有用入理財察吏安民之責果能用當其才庶吏治民生可望日有起色該藩臬等歷練既久並可備異日封疆之選關係尤爲緊要各直省督撫於所屬運司道府中隨時留心察訪如有通達治體卓著循聲堪勝兩司之任者出具切實考語據實密

保並將該員等才具長短分晰臚陳以備國家因材器使
卽非屬僚而有賢能素著爲該督撫所真知灼見者亦不
妨切實聲敘該督撫等受恩深重務當仰體朝廷慎重旁
求之意秉公保奏不得徇一己之愛憎稍涉冒濫至州縣
等官如有政績卓著堪勝道府之人仍著懷遵疊次諭旨
據實保薦用備簡擢等因欽此跪讀之下仰見我

皇太后

皇上慎重人才求賢若渴之至意欽服莫名伏查藩臬兩
司綱維一省事至煩而責至鉅也然當尋常無事之時所
爲理財用人數端在安靜之吏尙可從容而理今則軍務
未平需餽甚急非綜核過人者籌措必形其拮据瘡痍甫

定民氣易浮非嚴明夙著者撫馭必憂其扞格又况各省
洋務方興安輯與防禦並重更非通達時務隨事制宜鮮
不虞其僨事者夫今日之運司道府大抵從容坐鎮之才
易求而謀略濟時之才難覩

臣欽承

聖諭飭舉所知既慮無知人之明尤恐蹈蔽賢之咎茲查
訪得所屬之按察使銜山東遇缺題奏道薛福辰山東督
糧道周恆祺他省素識之廣東鹽運使鍾謙鈞湖北候補
道張蔭桓等四員心術共信其忠貞才華頗形其開展

臣

察識既久聞見最真用敢據實臚陳恭候

採擇抑

臣

竊有進者現我

國家當中興極盛之時正百度維張之日而最要之漕務

河務兵饟洋務諸大政尙有不及具舉者患在財用之未
充夫治國必先於足用用之不足非盡財之不生也亦浮
冒者之不查怠玩者之不振耳臣於他省情形不得知卽
以東省而論司庫協撥頻仍僅恃徵解爲周轉而尙不過
於支絀卽吏治民生亦因此始有轉機實以嚴稽查而勤
督催之故亟賴得嚴明貞固之藩司共相維持庶可日臻
上理如臣所知各員其才力實足裨富強之助儻蒙
聖明鑒拔或日後有改行易轍者臣甘任欺徇之罪所有
據實保薦賢員各緣由謹恭摺密奏伏乞

皇太后

皇上聖鑒訓示謹

奏

侯工收支各款摺 同治十一年六月二十九日

奏爲謹將侯家林河工合龍收支各款繕具簡明清單恭摺仰祈

聖鑒事竊 臣 籌辦侯家林河工於本年二月二十六日奏報堵口合龍欽奉

上諭東省鄆城地方舊未設有磨汛辦理河工亦無成案可循此次工程用款著開單奏明咨部存案免其按照成例報部核銷他處工程有案可循者不得援以爲例該部知道欽此查侯家林工程原估銀三十萬兩經前署撫 臣 文彬奏明籌撥藩庫銀二十萬兩運庫銀五萬兩糧道庫銀五萬兩在案嗣以溜勢改變議挑引河係臨時酌辦在

原估銀兩之外經臣奏陳各情形奉

旨所有工需籌撥銀兩著照所請准照成案免其扣減用
款如有不敷仍酌量籌撥以應要需欽此續准部文籌撥
工需銀三十萬兩應扣核減二成及實支八成銀內應扣
六分平餘各銀兩遵

旨准免扣減等因在案遵卽續提藩庫銀六萬兩統計提
動藩運糧道庫銀三十六萬兩交河工局支放各款現將
大工合龍款項逐一清釐計堵口各款實用銀二十八萬
八千四百九十四兩零引河各款實用銀三萬九千八百
五十八兩零統計實用銀三十二萬八千三百五十二兩
零計餘存銀三萬一千六百四十七兩零應仍發還藩庫

存儲惟廂兵口分一項部議仍應照舊扣減成平而接准部文係在合龍之後查已支發實銀此項應扣減銀一百九十二兩二錢應另籌補歸款據辦理總局候補道薛福辰詳報前來臣覆核無異查鄆城地方舊未設有廳汛此次工程在東省係屬創辦初無成案可循臣督飭在工具弁核實辦理其有工次必用之需而倉卒不及備者隨時變通籌辦亦有向來河工習用之款而非工次所急需者概從刪除以杜浮濫所有秫稽料垛分派濟甯等十三州縣購辦絲麻等項派員赴河南江蘇等處購辦星夜趲運應期濟用通計一切價值遠近運費視向來河工辦事固屬節省甚鉅而各料核實工作併力程功其得力尤在節

省之外引河工程飭河南委員等估計約需銀十二三萬兩嗣續調守備劉綦相度地形變通利導僅估實銀四萬兩臣猶慮工程繁鉅所估過省未必敷用是以預籌銀六萬兩及引河告竣用款猶未及所估之數實出意外是此次辦理堵口雖未查照成案而涓滴歸公實與按照例案無異也近年如河南榮澤堵工最爲節減此次用款視榮工節減不啻百餘萬之多委係工堅料實堪資捍衛荷蒙諭旨免照成例報部核銷欽感無極除民堰津貼銀兩容俟另核具奏外相應將堵口工次收支各款繕具簡明清單恭呈

御覽並咨部存案他處工程有案可循者仍不得援以爲

例所有侯家林合龍收支各款理合開單奏陳緣由謹恭
摺具奏伏乞

皇太后

皇上聖鑒訓示謹

奏

謹將侯家林大工合龍收支各款開具清單恭呈

御覽

計開

收款項下

一 陸續收藩庫銀二十六萬兩

一 收運庫銀五萬兩

一 收糧道庫銀五萬兩

支款項下

一 支採辦秫稻銀九萬五千二百五十三兩七錢四分六釐

一 支採辦絲麻銀六萬七百十八兩五錢三分

一 支採辦楊木椿銀一萬二千七百四十五兩九錢五分
一 支楊木椿車腳銀四千二百一十一兩三錢二分

一 支南北壩基土方價銀三千一百五十一兩五錢四分
一 支正壩土方價銀二萬二千三百四十兩五錢

一 支邊壩土方價銀一萬三千九百一十六兩七錢三分
一 支夾土壩土方價銀三萬八千六百一十一兩二錢九分

二 釐

一 支正壩後餵土方價銀一萬四千一百四十四兩五錢
一 支各項夫工銀一萬七千二百四十兩

一 支鑲兵口分銀七百七十五兩

一 支文武員弁薪水銀九百十六兩

一支緩纜各價銀四千四百六十九兩五錢

以上共用銀二十八萬八千四百九十四兩六錢八釐

一支挑挖引河土方價銀三萬九千三百五十八兩二錢四分五釐

一支賞給守備劉蕪銀五百兩

以上共用銀三萬九千八百五十八兩二錢四分五釐

統共用銀三十二萬八千三百五十二兩八錢五分三釐
除用寶存銀三萬一千六百四十七兩一錢四分七釐
還藩庫登明

侯工續籌款項免扣減平片

同治十一年六月二十九日

再臣接准部文鑲兵口分一項仍應照舊扣成減平查此項應扣減銀一百九十二兩爲數無多除另籌補歸款外又准部文籌撥銀三十萬兩應扣核減二成及實支八成銀內應扣六分平餘各銀業經奏奉

上諭准免扣減惟此後續籌等款其有照章應扣二成及減平各銀兩仍令遵照部定章程分別扣解等因臣自應遵辦惟查此次工程原估銀三十萬兩嗣因大溜全注侯家林口門深虞堵合之後水無出路必致四處潰決始議酌辦挑挖引河此項銀兩實非原估所及是以續請酌量籌款以濟要需竊惟引河與壩工原屬一事支發款項不

容兩歧此次續用之款自應一體支發實銀以歸畫一且
初議辦理引河再四估計約需銀十二三萬經臣飭令守
備劉綦設法變通減估至實銀四萬兩省費已去十分之
七及引河告竣僅用實銀三萬九千三百五十八兩零且
內有一萬一千五百兩卽係三十萬內節省之款是此次
大工除原估三十萬兩外添辦引河僅用銀二萬八千三
百五十餘兩較諸按照成例就三萬九千八百五十餘兩
內扣成減平尙屬有盈無絀此次用款銀三十二萬八千
三百五十二兩零除三十萬兩無庸扣減外其續用之二
萬八千三百五十二兩零應懇

恩俯准免其扣減以昭核實而歸簡易謹附片具陳伏乞

聖鑒訓示謹

奏

改撥閩省第八號輪船片

同治十一年六月二十九日

再東省擬撥閩省安瀾輪船爲巡哨洋面之用前經

臣奏

明奉

旨允准並咨會閩省查照在案茲接准閩省督

臣

文煜撫

臣王凱泰咨商以安瀾一船已經駛赴粵東其第八號輪船與安瀾造法無異如派赴煙臺可期合用惟七八月方可竣工又須試演二三月始能駕往北洋如東省急需輪船查有第一號萬年清可先行派往如查不得力俟第八號告成再行更換等因並將奏定章程咨行到東

臣

查東

省洋面島嶼林立海汊紛歧沙埂暗礁隨處皆是此次奏調輪船專爲巡緝洋盜之用自須靈活堅實之船方期得

力前聞安瀾一號係屬新造工堅法密於東省洋面實爲相宜是以指明奏請茲安瀾既派赴粵東聞萬年清一船製造已閱多年其中機器船身歷久易壞且東省洋面礁石最多極易碰觸恐須隨時修理以東省新設輪船一切修造器具均未製備若船身過舊動須修理東省既無船廠自必駕駛返閩來往需日欲速反遲徒滋糜費現查東省洋面巡哨尙不喫緊計第八號輪船明春二月必可一律竣事現擬俟此船告成後定於明年正二月內咨請駕駛來東庶新造之船修理可以需時而於東洋巡哨實屬倍有神益除咨明閩省督撫臣查照辦理外謹附片具陳伏乞

聖鑒訓示謹

奏

侯工民堰酌給津貼摺

同治十一年七月三十日

奏爲鄆城侯家林大工上下游一帶民堰一律增培高厚
修整完工遵

旨酌給津貼核計用過銀數據實陳明恭摺仰祈

聖鑒事竊

臣

前將驗收鄆城各州縣新修民堰工程一律

完固情形業經具奏在案伏查侯家林大工地屬鄆城沮
河東岸本無隄身近年民間雖造有土堰一道未能高厚
故上年致有疏虞前者定計堵口卽須先議培隄臣原擬
自沮河頭至楊家營六十餘里爲切近口門最要之工係
僅就沮河而言其沮河以上爲濟河傳所謂濟出爲沮者
是也地居上游其西北一帶數年以來漸爲黃流盛漲之

所及居民於距水較近之處亦築有土堰稍資攔護第猶形卑薄自應併議修培計自鄆城之沮河頭起至荷鉅交界之龍鳳集止計五十餘里臣於駐工督辦之際卽飭將此段堰工與下游分投趕辦以期一氣呵成此前奏所稱共長一百一十三里業經一律完固者也嗣復查得龍鳳集地勢雖已較高然堰形猶順東南若再多修四里餘至荷澤之泰山廟止則轉向西北益臻完密當復委員會同該地方官勸諭趕築亦於六月初一併告竣連前共計一百一十七里餘上游之南路各工除鄆城本境承修外復酌派濟甯嘉祥鉅野城武定陶荷澤汶上各州縣分段協修而鉅野荷澤又各有本境承修之工下游之北路各工

自鄆城七里堡至楊家營略南之王家垓止計三十餘里均屬貼溜頂衝情形最爲險要而鄆城被災彫敝民力實有不遑當堵築大工之際竊計合龍伊邇深恐此段趕辦不及當經調雇觀城濮州鉅野荷澤汶上民夫幫築以期迅速統計各段工程每日工作民夫約不下二三萬人故能於兩月有餘將百餘里之長隄剋期蒞事所有調發之牧令既須先事籌畫又須隨時督催其監工之委員梭織彈壓所夕嚴催更屬不遺餘力卽各州縣紳民遠道裹糧共趨畚築固以顧全大局卽可自保身家實緣感戴皇仁軫念災區旣不惜費鉅帑以堵決口復准予給津貼以培民隄故富者各能好義捐資貧者得以食力趨事合

數州縣之民心志莫不如一使百餘里卑薄不堪之舊堰遂成一律高整之新隄且不料程功如是之速綜計發給各州縣承修協修堰工津貼及調雇幫築民夫工價實共動用司庫銀九萬一千一百八兩八錢一分九釐就前定堰身底寬五丈頂寬一丈五尺高一丈二尺核計土方價值每里約需銀二千數百兩新堰共長一百一十七里餘計需銀二十四萬餘兩今用銀九萬一千餘兩不過十分之四其餘則全藉資民力計節省公項十五萬餘兩而其高整堅實與官工正復無異惟是道里縣長所有防汛事宜極關緊要臣現仍飭各監工委員就原派段落會同辦理善後之員加意防守並因大工以北之三十餘里情形

尤險復將原駐張秋各勇營調紮近堰一帶分段巡查暇時照舊訓練仍責成本境附近各村莊於大汛時一體巡防遇險搶護以期周帀俟經歷伏秋兩汛如能一律鞏固防範無虞容臣將監修防守之官弁紳董查明奏懇

恩施以昭激勸至此項用過銀數係酌量情形計里發給各州縣與民間自捐之數均勻津貼支用不能按款核計應請

天恩敕部立案免其造冊報銷所有修築民堰一律完固並遵

旨動用津貼銀數核實奏報緣由謹繕摺具奏伏乞

皇太后

皇
上
聖
鑒
訓
示
謹

奏

侯工三汛安瀾分別獎勵摺

同治十一年九月三十日

奏爲東省本年堵築侯工大壩並上下游新修民堰現在
經歷三汛一律穩固安瀾恭摺具奏仰祈

聖鑒事竊東省黃水自上年八月間侯家林決口水勢奪
溜直趨濟甯以南灌入運河沿途諸湖勢將悉成淤阻而
江南清淮一帶亦慮淹沒幸蒙

皇太后

皇上軫念運道民生關係重大節次欽奉

諭旨飭令急籌堵塞口門

臣仰稟

宸謨勉竭駑鈍將該處決口趕築合龍並因上下游一帶
雖有民埵甚形單薄且多殘缺不齊必須一律普修並增

高培厚方足以資捍禦復奏蒙

皇仁不惜帑項發給津貼俾民力不至拮据期於有成是以荷鉅郵三縣一百二十里之舊堰均得一律堅整與官隄相等經臣先後奏報在案惟念修築旣多費帑金則防守宜竭盡人力臣當卽嚴定章程派分汛地責成各州縣調撥民夫飭派記名提督王正起副將李培榮統帶各營勇隊移紮近堰一帶並將大工節省餘存料物分別運備以備鑲護搶險之用飭令布政使銜署兗沂曹濟道潘駿文不時親往查勘專派鹽運使銜候補知府馬映奎駐工總辦善後事件其前派監修民堰各委員卽令各在原修段落協同防守以專責成查壩工堰工先後告竣均在桃

汛伏汛漲發期內成功本屬倉卒而入夏以來雨水漸多
來源日旺溜勢近堰之處頗形決湍且水面較寬因風撞
擊其力尤悍幸水猶時長時消沿途工程俱以次搶辦完
竣計自大壩北基起至王家垓迤北一帶止三十餘里緊
貼大溜當河水未發之時奔騰激湍其勢已險最爲喫重
臣當派記名提督王正起統率所部振字各營儘先副將
李培榮所帶培字一營分段防守均於近溜處加鑲護埽
並擇要建築挑水順水等壩以拓溜勢其消淺兜灣之處
亦做防風以資搜護堰頂鱗次堆積土牛以備急用王正
起段內北路頂衝尤甚該提督以水勢悍激正堰難於抵
禦更添疊子堰以護其身辦理極爲周密至大壩以南應

行鑲護工段經馬映奎督同委員分別趕辦亦俱埽壩櫛
比一律高整並責成署鄆城縣知縣周以恩調集民夫逐
段安設窩鋪輪替巡守刻不離人合龍大壩經雨之後屢
次陡險趕經加壓重土幫寬後戩愈臻堅實至七月中旬
本境大雨連朝達旦水勢遂有長無消甚至三日之間長
水五尺餘寸壩堰自南而北處處喫重前做埽段多有入
水及蟄裂之處復經趕緊加鑲追壓刻刻嚴防無敢稍懈
旋接河臣來咨據陝州萬錦灘水報自七月二十日至八
月初八日四次共長水一丈四尺上游之水悉行下注以
致坡河各水匯而爲一各處奇險疊生勢殊岌岌幸經王
正起李培榮馬映奎督率營勇民夫晝夜校巡分投搶辦

不遺餘力而馬映奎總辦南北支發一切又復布置精詳
事事核實用能與水爭勝保護無虞至八月十九日雖暫
時見退然二十七日猶續長一次九月初以後乃漸見消
落統計驚濤駭浪拍岸盈隄約五十餘日之久實屬異常
盛漲現在節屆霜降所有大壩民堰一律穩固普慶安瀾
據潘駿文馬映奎等稟報前來此皆仰賴

皇太后

皇上如天之福神祇效靈臣欣幸之餘尤深欽感所有侯
工大壩本年新建大王廟當河水盛漲之際往往顯示靈
異化險爲平擬請

御書匾額發由臣敬謹恭懸以煥

天章而昭

神貺惟查河工大隄向係設有廳汛其防汛事宜兵夫皆所素習今鄆鉅各縣之民堰旣無經管之廳汛可專責成又無熟諳之弁兵可資分撥惟恃遴派之地方文武各員激勵民夫營勇胼手胝足共竭勤苦以與水爭無事之巡防昏夜無殊於白晝有險之搶辦風雨倍奮於晴明衆力一心未嘗少懈至大工善後經費多係另撥鉅款今臣以經費爲難之故未敢請發一帑僅資大壩節省之料物爲三汛防險之要需計長隄百二十餘里之遙汛期八閱月之久雖屢瀕危險竟能竭力搶修通工完固所有在事文武各員實屬著有微勞相應籲懇

恩施以示鼓勵其餘監修及防汛文武員弁暨各州縣從前所派協修民堰並隨同搶險始終出力之委員紳董人等容臣查明核實併案請獎俾昭激勸而勵將來現在瞬息冬令水勢暫可消涸至長隄駐守民夫除擇要酌留外餘均裁撤以節民力勇營仍令回防以資巡緝其沿堰所修埽壩責成該地方官曉諭附近居民隨時照料修補至凌汛時挂樁攔護以免殘缺此外未盡事宜並飭妥爲籌議分別辦理所有候工大壩及修培民堰經歷三汛一律穩固緣由理合恭摺具奏伏乞

皇太后

皇上聖鑒訓示謹

奏

覆核水師口糧管制摺

同治十一年十月三十日

奏爲東省水師原議酌增弁兵口糧遵照部議分別核減並裁贖饜銀不敷抵給擬由海防緝捕經費銀內如數籌撥暨文登陸營請改爲都司專營恭摺覆奏仰祈

聖鑒事竊

臣

前因整頓東省水師擬請籌款赴粵製造師

船並將文登水師三營併爲二營酌裁弁兵優給口糧認真訓練以期得力臚列條款具奏嗣經部

臣

逐條議准並

以文登協副將仍以水師兼管陸路一節該處副將既改爲統領登州榮成兩營水師副將以督操水師爲專責若再令兼顧陸路難收實效應毋庸議文登營原設尙有中軍都司一員自應改歸登州鎮總兵統轄以免推諉又所

請外委額外外委以及戰守各兵長年口糧量予加增卽在裁贖兵饗內估計支銷自爲認真訓練起見惟加饗較之例支數目增至一倍酌留額缺浮於裁額今以裁贖饗項增給酌留弁兵加倍口糧核計數目不敷抵給又所請支給舵長等項口糧銀數比較長江水師章程亦有浮多之處應令確實核減並將裁去饗項共有若干新增口糧應需若干逐一分晰核定數目再行奏明辦理等因奏奉諭旨依議欽此咨行到臣伏查文登協副將除管轄文登水師營外向兼管文登陸營該營額設中軍都司一員千總二員把總三員外委四員額外外委一員馬兵七十三名守兵三百八名今文登協副將旣改爲統領登州榮成

水師兩營副將更番駐紮登榮兩處事務繁劇責有攸歸
誠如部議不應再令兼顧陸路以致顧此失彼該營本有
中軍都司一員應請改爲都司專營將文登營中軍都司
刪去中軍字樣擬作爲文登營都司仍歸登州鎮總兵統
轄其駐劄文登汛千總一員卽可作爲該都司中軍千總
無庸再添其餘額設千把外委及馬守兵丁各有專司汛
地應仍其舊又臣原議新改水師除把總以上各員俸饌
仍照舊例支領毋庸酌增外擬請將外委每員每月加津
貼口糧銀三兩額外外委戰兵每名每月加津貼口糧銀
一兩五錢守兵每名每月加津貼口糧銀五錢每船各設
舵長一名副舵長一名桅長一名副桅長一名舵長每名

每月給口糧銀六兩桅長每名每月給口糧銀四兩五錢
副舵長副桅長每名每月給口糧銀三兩九錢以上弁兵
仍准其支領舊例應得之饟銀米折戰兵內充當之舵長
桅長其本身所充之戰兵口糧卽在其內仍照戰兵每月
支給米折銀兩此外舊給之公費雜支亦仍照給惟紅白
賞卹等款旣經酌加津貼應行裁去原因船之有舵舵譬
如人之有手足一切賴以掉運其舵長桅長最關緊要必
須能測驗風雨習諳水性而又膽識兼優熟悉海道之人
方足以膺斯選若非厚以口糧斷不易於招徠與長江情
形迥不相同民間雇募工價本亦懸殊且長江水師全在
腹地城池村鎮比櫛相望食用一切較爲平減海艇則巡

哨所在全係大洋其間停泊之處多係荒涼島嶼購買食物昂貴不知凡幾且每船僅設正副舵長桅長各一名雖口糧獨優核計長年之需有限而收得人之益良多此外如額外外委戰兵每名每月加津貼口糧銀一兩五錢守兵每名每月加津貼口糧銀五錢統合舊例應得餽銀米折額外外委同戰兵每名每月祇得銀三兩三錢守兵每名每月祇得銀一兩八錢尙須照例核扣朋銀爲數本屬無多旣須責令常年在船練習不能不顧其身家俾得安心樂爲我用况出洋又不另加津貼此中名雖增多實則仍係節省臣再四籌維俱難核減應請仍照原議辦理惟外委稍優請改照額外外委亦每員每月加津貼銀一兩

五錢以節糜費統計新增口糧每年應需銀一萬四千五百一十兩四錢前請酌裁外委六員額外外委四員戰兵四百四名守兵一百七名例馬二十四匹每年可節省餼項及紅白賞卹共銀一萬二千三百六十六兩五錢四分除抵給新增口糧尙不敷銀二千一百四十三兩八錢六

分臣亦明知

國家經費有常餽項難以驟增然欲兵歸實用又不能不酌加口糧下餘不敷津貼應由本省常年所捐海防緝捕經費銀內如數籌給不准動用正款以重帑項而期經久除將應增應裁餼項細數造冊咨送戶部並尙有未盡事宜容俟師船到東挑定弁兵隨時分別奏咨辦理外理合

恭摺覆奏伏乞

皇太后

皇上聖鑒敕部核覆施行謹

奏

師船由粵管駕來東摺

同治十一年十月三十日

奏爲東省在粵製造師船懇懇

天恩俯准

敕令粵省酌派水師得力員弁駕駛來東以昭慎重恭摺
仰祈

聖鑒事竊

臣

前因遵

旨整頓東省水師奏明籌款遴委候補道李宗岱酌帶文武員弁赴粵製造大小拖繒船十四號配齊洋礮軍械就近在粵海等處選帶熟諳水師員弁數員遴募善於駕船之舵工桅工泅水人等一併隨船來東藉資教習以立水師根本茲據該道李宗岱稟報業已購料鳩工趕緊製造

約計來春可以一律告竣即應於春暮夏初乘風北上臣
伏查此次製造船隻爲數較多由粵抵東道路遙遠將來
工竣之後駕船之舵工水手人等若悉由廣東招募粵省
民情素稱强悍而受雇者又難保無游手好閒之徒身家
恐不盡可靠將來一經雇募不時遠涉重洋僅恃一二員
弁爲之督率不易駕馭而人數過多又各船均配齊槍礮
火器關係尤重設選募稍有不合其流弊不可勝言卽如
咸豐年間前撫臣崇恩派委前登萊青道張鳳池在粵造
成頭猛船十四隻派弁駕駛回東而到東者僅止一號餘
皆遭風沈溺及不知下落此其明徵現在各省洋面雖尙
靜謐然亦須倍加謹慎臣再四籌思與其臨時雇募無業

聞人莫若就近飭令粵省水師駕送較爲可恃合無籲懇
天恩俯准

敕下兩廣督臣廣東撫臣一俟李宗岱稟報前項師船全

行造齊出水卽酌派水師營誠樸可靠將弁酌帶兵丁會
同東省委員代爲駕送來東以免疏虞到東後仍卽由臣

籌給川資咨送回粵臣爲慎重師船起見是否有當理合
恭摺具奏伏乞

皇太后

皇上聖鑒訓示謹

奏

酌改船式片 同治十一年十月三十日

再臣前因整頓水師奏准委員赴粵製造拖繪船十四號酌擬十二號各身長七丈六尺頭寬八尺中寬一丈六尺尾寬二丈大桅約高七丈六尺頭桅約高四丈九尺三桅約高三丈四尺又二號身長九丈頭寬九尺中寬一丈八尺尾寬二丈二尺大桅約高八丈二尺頭桅約高五丈二尺三桅約高三丈七尺通身兩層板成造外層板厚八分內層板厚二寸四分船身包裹鐵片一層船面再加厚板一層亦包鐵葉一層以防震裂茲據承辦委員候補道李宗岱稟稱該道抵粵後諮訪熟悉船工之人並確查粵省歷次所造拖繪船式樣悉心參酌原定船身丈尺微嫌頭

窄尾闊竊恐駕駛不甚靈捷且北方海風甚勁桅身亦不宜太高擬請將身長七丈六尺之師船改爲頭艙面寬一丈一尺二寸中艙面寬一丈八尺尾艙面寬一丈七尺大桅約高六丈頭桅約高五丈四尺三桅約高三丈身長九丈之師船改爲頭艙面寬一丈七尺六寸中艙面寬二丈二尺尾艙面寬二丈五寸大桅約高六丈六尺頭桅約高六丈三桅約高三丈四尺庶幾寬窄長短相宜乘風尤爲穩利至海水味鹹船身最易生蟲蝕木從前海船未諳以銅包底之法故於外面底身另加薄板一層以禦蟲患此次所造船隻已用二寸四分堅實厚板成造並先已請改銅片包底則船身堅固不畏蟲蝕應毋庸再加外層八分

薄板又艙面現用二寸四分厚板加以灰釘縝密無虞震裂亦不必復用鐵葉包裹致滋笨重等情行據軍需局司道核明詳請具奏前來臣伏查原奏議定船底係用鐵片包裹嗣查鐵片易於生鏽不如銅片堅緻且從前海船俱以銅片包底自應改用銅片至所請將大小師船頭中兩艙改寬尾艙改窄各桅長短酌量互改各節均係爲船隻駕駛合度起見其艙面減去鐵葉亦可免下輕上重之虞查從前定議具奏之時原聲明未盡事宜隨時悉心核議分別奏咨辦理茲據該道稟請酌改船式一切因地制宜均如所稟製造以期適用未敢拘泥原議稍涉滯礙除批飭遵辦並咨部查照外理合附片陳明伏乞

聖鑒訓示謹

奏

預籌來年漕運會勘挑河修隄摺

同治十一年十一月十五日

奏爲預籌來年漕運會勘挑河築隄情形籌款擇要辦理以利進行恭摺奏祈

聖鑒事竊惟治漕必先治河從前黃運分行之時東省運河按照歲挑大挑舊章核辦南來各幫卽可暢行無阻自黃水穿運以後運河受病過深節節淺阻江北漕糧試行河運歷有數年原擬逐漸規復舊制無如其病在黃舍治黃別無治運之法而休於工鉅費繁一時無從措手祇可將運河各處工程擇要設法修整以爲浮送漕船之計凡有挑浚築壩修隄事宜臣寶楨均先期嚴飭地方州縣隨宜趕辦並於漕船到時督同糧道河道及委員等設法提

考卷九十一
三十一
挽數年來幸無貽誤歷經奏

聞在案計明歲南漕仍由河運亟宜先期籌辦臣寶楨先

於十月初間卽經札飭東昌府知府程繩武運河營守備

鮑福元會同前赴漕運經行各河道詳細履勘適臣松年

於十月十九日行抵濟甯閱伍後於二十四日乘舟沿運

逐細查勘河道臣文彬於十月十三日由清江起程二十

六日至濟甯亦卽沿運履勘均先後至張秋東昌一路進

省與臣寶楨會商一切卽據委員程繩武等稟稱勘得安

山三里堡西南黃流已越過三里堡漸漸北徙是以該堡

入坡缺口淤墊過高來歲漕船恐不能由此繞入坡河行

走不得不設法疏通運道爲救弊補偏之計三里堡係安

山入運咽喉此處若不開通無路可繞計自三里堡至二道撥頭道樓約二十餘里內乾運河四百餘丈淤河一千四百餘丈必須節節深挑三里堡缺口一百二十丈二道撥缺口四十丈須嚴爲堵閉以期攔汶濟運頭道樓以北卽戴廟閘河身閘座均已淤高勢難挑挖且緊對老黃河頭黃水尙深挑挖非易並恐隨挑隨淤徒糜經費於事無益擬卽由頭道樓入馬家口繞過戴廟閘五空橋行走計繞道祇十三四里五空橋北至靑東汛下十里堡之南運河現尙通暢無須挑挖至下十里堡北馬家單薄有淤河八十餘丈亟應興挑單薄以北卽趙王河另股大溜自西而東衝成一大缺口漕船經過深慮旁衝然此口萬不能

堵漕船將來亦萬不能不由此經過計惟有將缺口兩邊
堅築裏頭將緯道加高培厚漕船過時用闕纜倒放前進
卽較穩妥缺口之北卽姜家莊有乾河三段計二百五十
餘丈又淤灘四十丈此處必須開通方能順暢姜家莊東
小馬家單薄陸家單薄有兩小缺口亦須堵閉自姜家莊
乾河以北至田家灣有運河一段水尙通暢田家灣至沈
家口有乾運河長一百五十餘丈沈家莊淤灘四十丈均
應深挑其沈家莊北夾河莊有乾運河六百九十餘丈淤
墊過高不易挑挖擬卽由沈家口積水開繞入西坡走道
人橋至八里廟入張秋口門其口門攔黃壩內淤河一百
二十餘丈至高家林又淤一百四十餘丈高家林隄缺口

一處七十餘丈均須分別認真堵挑方可束黃入運以上挑工切實估計需銀二萬一千五百餘兩惟河道既經疏通凡官隄民堰殘缺者亦須一律擇要補築水勢始免旁洩茲擇其官隄之必須修者共九十段內大小缺口五處切實估計應需銀七千八百餘兩其民堰應由地方官查照成案另行稟辦等情並繪圖貼說呈送前來臣松年臣文彬逐加覆核與親勘情形尙屬相符臣寶楨河務本非素諳而歷年辦運南漕往來河干旁諮博採亦已竟委窮源察核所陳辦法甚爲詳盡估需經費亦屬十分節省彼此商推意見相同惟黃河朝東暮西變幻無常如該府等所勘辦理雖未敢云全有把握然就目下情形而論已屬

因勢利導竭盡人力來年漕艘似可聯檣北上不致貽誤
除飭署藩司長廣按照原估銀數迅速籌款撥發東平東
阿壽張三州縣承領備齊器具雇募夫工趕辦並由臣寶
楨遴委委員分赴各處會同地方官切實辦理一面檄飭
運河道王化堂實力督催俾臻妥速其陽穀聊城堂邑清
平博平等縣應挑長河工段亦須擇要挑挖應俟春融後
由臣寶楨委員會同各地方官確勘估辦尙不在現估銀
數之內至興工後如有未盡事宜俟來年漕船經行時再
行隨時相機酌辦總期無誤漕行上慰
宸廑所有勘估來歲南漕經行河道擇要挑浚修築及估
發經費銀兩各緣由謹合詞恭摺具奏伏乞

皇太后

皇上聖鑒訓示再此摺係臣寶楨主稿合並陳明謹

奏

黃河穿運請復淮徐故道摺

同治十一年十一月二十八日

奏爲遵

旨會議黃河穿運情形就東境上游築隄東黃恐濟運終無把握地方受害滋大請仍挽復淮徐故道以維全局恭摺覆陳仰祈

聖鑒事竊

臣寶楨

臣文彬於同治十一年九月初十日十

四日先後欽奉寄

諭喬松年奏遵議黃運兩河情形並籌堵運河各摺片著丁寶楨文彬將該河督摺內所陳各節詳細酌度妥議具奏但求於事有濟不得固執己見其片內所稱將黃河穿運各缺口分別酌堵酌留並挑浚河身修培隄工各等語

著一併議奏原摺片著鈔給閱看等因欽此查兵部主事
蔣作錦所遞治河條議臣寶楨會於同治十年正月會同
前漕臣張兆棟前河臣蘇延樾公同查勘會議將辦理難
期得力緣由恭摺覆奏在案臣文彬於穿運處所未經目
覩曾於二次奏報接印摺內聲明俟十月前赴東省查看
茲沿途履勘河道直至張秋穿運之處詳細審度因便道
至濟南省城與臣寶楨會晤悉心商酌查河臣原奏所論
黃河泛濫運河淤墊情形甚爲詳悉因擬先堵黃流旁缺
之霍家橋及其餘各缺口使水勢專注張秋一處並先於
北岸修築舊隄南岸創建新隄爲束黃蓄清之計其張秋
以北運河卽借黃濟運若有流弊再用引衛濟運之策等

語復查黃水自銅瓦廂決口由張秋穿運入大清河張秋以西雖有沙趙棗梨等河河身狹隘多已淤平水勢泛濫無歸故情形變遷靡定其初大溜在附近張秋之南壩頭復漸移至八里廟同治四年試辦河運漕船渡黃入運已覺煩難七年黃水衝決趙王河之紅川口大溜漸移至安山沈家口一帶遽行淤淺其患已近分水口以北至上年八月黃水復決沮河之侯家林漫水下注勢且爲害於分水口以南而北路戴廟一帶亦形梗阻幸將決口堵合逼水北趨然已淤之運河難期通暢連年漕船經行北路則築壩挑河南路則繞坡導引竭盡人力始能浮送若不速籌長策則運河受病日深將有不可收拾之勢願運河之

考系系
三
壞以黃水病之也穿運之黃水黃與運正復交病欲治運必先治黃目前治黃之法誠不外堵銅瓦廂以復淮徐故道與就東省築隄卽由利津入海兩策顧謂二者之中以就東省築隄東黃爲優而上下游均歸緩辦臣等實有未見其可者謹將實在情形爲我

皇太后

皇上敬陳之考黃河入海故道初本在北自漢至宋漸徙而南固有莫之爲而爲者元明以後開運河以通黃故治黃尤以濟漕爲重其閒黃水之橫決在南在北皆所時有除山陽清河以下仍就近入海外其在桃宿徐邳以上決於南岸則必注淮以達江決於北岸則必穿運以入海自

有明以來凡河決北岸輒有改道之議究之仍使挽令南趨者非樂爲勞費因患其穿運以阻漕故其勢不得不然也今張秋穿運之黃水欲令其卽由利津入海卽僅就河而論其不便約有數端自銅瓦廂以至牡礪背計程一千三百餘里創建南北兩隄兩隄相去廣狹牽計其間約須十里始足爲河槽灘面容水之地此一千三百餘里所留之河身除現在淹沒不計外尙須棄地若干萬頃此項棄地居民不知億萬作何安插是有損於財賦者一也兩隄相去十里以內民間之廬舍固難悉數其沿河州縣城池自二三里至七八里者東省計不下十數處若齊河濟陽齊東蒲臺利津各縣皆近在臨水築隄則必須遷避是有

難於建置者二也。大清河南岸近接泰山之麓，山陰之水悉向北注，除小清河、淄、瀰諸河均可自行入海，其餘小溪、河、胥以大清河爲尾閘，置隄束黃，以後水勢擡高，向所洩水之處留閘，則虞其倒灌，堵遏則水無所歸，是有妨於水利者三也。東網鹽場坐落利津，濇化、壽光、樂安等縣濱臨大清河兩岸，自黃水由大清河入海，鹽船重載溯行於湍流之中，甚形阻滯，而灘池間被黃水漫淹，產鹽日絀，海灘因被黃水淤遠，納潮甚難，黃河定從利津入海，則舂運倍極險艱，灘場動遭衝沒，東網全局必至隳廢，私梟亦從而蠶起，是有礙於漕綱者四也。臣寶楨身任地方，於通省大局所關久遠之計，既有所見，自當據理直言，然使雖有以上

諸弊而於治運濟漕果能確有把握則京倉爲根本至計
猶當權利害之輕重而量爲變通願臣等熟思審計實亦
未見其可恃而深覺其可慮也查原奏兩岸置隄擬將上
下游暫行緩辦先自中間有關運道之處施工北自開濮
交界之舊隄起接築至解家山止南自張家支門起創築
至馬山頭止兩隄各計一百七十里查濮范舊隄卽前
修築之金隄自開濮交界爲始與張家支門南北相去約
計七八十里灘面太寬河槽斷難歸一不能刷深行溜仍
屬散漫停淤比至沈家口張秋之間河面陡然收窄水勢
倍覺擡高南北所留運口必至萬分喫重南運口難免倒
灌之患北運口恐有奪溜之虞臣以利害計之南運口倒

灌患雖大而尙遠北運口奪溜患彌近而尤烈現在直省
永定河患頻仍若黃水稍有奪溜奔騰匯注計將何施根
本之地不得不預爲計及此其可慮者一卽使黃河果爲
我所束分溜安流入運而欲借以濟運則仍可暫而不可
常從來借黃濟運雖有清水並行資其刷滌至日久終歸
淤阻今在南之汶水縱收蓄極足入黃後勢不敵黃必將
被挾東趨涓滴不能至北僅恃渾濁之黃流行於狹隘閘
河之內其淤倍速卽極力挑至閘底究屬挑不敵淤多糜
工費此其可慮者二至借黃有所不行必將倣南河套塘
之法卽不得不用引衛入運之計查南河之灌塘因有湖
水之出束清壩者近在咫尺是以灌輸甚便然查洪湖束

清壩自道光三十年吳城七堡引黃入湖卽已受淤其時距豐工失事尙有數年束清壩已患不暢裏揚運河已覺水少然尙可堵三河兩壩以資收蓄卽謂三河一堵高堰萬分喫重然亦係蘭儀決口以後高堰石工殘壞之故將來修整疏浚猶易設法若北路引衛以資套塘無論豫民爭漑田之利蘆鹽有阻遏之憂而引水於百數十里之遙啟放需時機宜坐失與南河形勢迥不相同况元城集自漳衛旣合之後所引亦屬濁流以濁易濁同一受病此其可慮者三且舊河惟決於北岸乃有穿運之患今創築之南隄設有漫溢無論在張家支門之上下游處處仍必穿運防不勝防况北隄一經疏失則

畿輔實當其衝受害尤爲切近至彼時復思變計則此番經營之帑金又已全成虛擲矣臣等悉心酌核無論就東省築隄束黃置上下游於緩辦即使經費充足上下游全行築隄而舉辦之時似亦無從著手再四籌思諸多窒礙似仍以堵合銅瓦廂使河復淮徐故道爲正辦彼此相衡計有四便就現有之河身不須棄地棄民其便一因舊存之隄岸培修不煩創築其便二廳汛裁撤未久制度旣猶可查考人才亦尙有遺留其便三漕艘灌塘渡黃不慮阻闕卽船數米數逐漸擴充無難徐復舊規其便四較之創建新隄冀幸於不可必者其得失甚覺懸殊也或謂蘭儀以下黃河廳汛前已議裁隄岸殘缺已甚此時仍議復舊

迹近紛更至修隄浚河所費不貲豈易舉辦不思前此之議裁廳汛時因軍務方殷不暇遽辦河務故裁此冗費以供饑需今則軍務漸平河漕爲

國之大政安得不亟爲整理况就東省築隄計由決口起至利津入海止亦一千三百餘里豈能不設廳汛以資防衛故前之議裁者權宜之善計今之議復者經久之要圖至舊隄雖屬殘缺而河身改道未久基址本有可因若新創則必先棄千餘里之糧地旣不便於

國計民生而兩岸築隄工需復非千萬金所能畢事其後煩費尤不待言似不若因仍復故爲事半功倍也今試將修築舊隄綜而計之修復舊河兩岸長隄其費約居十之

七堵合銅瓦廂口門並挑引河其費約居十之三前准部
咨令江東豫三省勘估舊河復故經費三省共估計經費
銀二千二百餘萬兩以一年修復而論力量實有不及若
分四五年次第興辦前數年所費尙不甚多惟最後一年
應併籌堵口挑河之費以期一律告成應將此數項經費
再行核實刪減估計通盤籌畫或協撥於各省或藉資於
釐金經費有著集事非難黃旣治而運亦可治斯爲一勞
永逸之計臣寶楨於河務本非素習祇以河患之在東省
今已十有八年被水十數州縣之民久困昏墊災緩賑恤
靡歲不有無術補救清夜難安頻年南漕經行凡挑浚築
壩事宜督飭地方州縣隨宜趕辦未嘗稍分畛域雖三年

以來於漕運尙無貽誤然智盡能索財力亦竭如東省築隄束黃卽可以利運與就東省築隄使之入海果害不甚大而事可必成亟願協力籌辦以冀及早觀成何敢稍執成見自取艱苦惟是利害所關甚鉅不厭詳求旣有一得之愚曷敢自安緘默臣文彬現署漕督濟運是其職任如果築隄束水旣糜鉅費而於濟運確有把握永無他患亦不願舍易就難惟此次親履查勘情形實利未可見而害且滋大亦不敢不虛衷商榷據實上陳應請

敕下在廷諸臣從長酌議恭候

乾斷施行所有遵議就東境築隄束黃恐濟運終無把握地方受害滋大各緣由謹合詞據實恭摺覆奏伏乞

皇太后

皇上聖鑒訓示施行再此摺係臣寶楨主稿合併聲明謹

奏

請加浙粵兩省中額摺日

同治十一年十一月二十八

奏爲浙粵兩省紳商在東省捐助軍餉懇

天恩俯准分別加廣中額以昭激勸恭摺仰祈

聖鑒事竊照東省軍興以後募勇征兵需餉浩繁庫款奇絀自同治三年至七年捻逆迭次竄擾通省蹂躪殆徧又加以黃水漫淹正賦率多緩征饟源更行竭蹶而各營防勦喫緊需用尤刻不可緩羅雀掘鼠岌岌堪虞每於萬分無可騰挪之際經前撫臣閻敬銘暨臣札飭軍需局司道督率提調官李宗岱丁彥臣等陸續向在東之浙江廣東兩省紳商暫行借墊隨時支應幸無貽誤俾各營士馬飽騰得以迅奏膚功計同治三年七月起至十年年底止挪

借浙省紳商銀三十萬四千九百四兩九錢五分一釐三
絲粵省紳商銀十一萬九千六百三十五兩八錢三分四
釐四毫八絲共借墊銀四十二萬四千五百四十兩七錢
八分五釐五毫一絲均於報銷案內歷次奏明接准部覆
准其領銀歸還在案茲據浙江候選知府吳慶祥等廣東
候選同知張紹南等以東省捻逆雖平西陲回氛未靖雲
貴亦未肅清紳商皆知庫款未裕情殷報效公同商酌各
願將前項借墊應候發還銀兩全數捐助軍饟不敢仰邀
議敘懇請照章加廣本省中額等情聯名呈經前軍需局
提調候補道丁彥臣移咨軍需局司道核明造冊詳請具
奏前來臣伏查奏定章程各省捐輸於本身給獎外一省

捐數積至十萬兩者廣一次文武鄉試中額各一名捐數積至三十萬兩者廣永遠文武鄉試中額各一名茲浙粵兩省紳商吳慶祥等當東省軍情萬緊饑需告匱之時乃能陸續借墊饌至四十餘萬之多已屬深明大義現在尙未籌款發還而該紳商等因西陲狃氛不靖雲貴亦未肅清庫藏未裕協撥頻仍各願將前項借墊銀兩全數捐助且不敢仰邀議敘尤見踴躍急公核與加廣中額定章及江省辦過成案相符合無籲懇

天恩俯准將浙省紳商捐銀三十萬四千餘兩加廣浙江省文武鄉試永遠中額各一名粵省紳商捐銀十一萬九千餘兩加廣廣東省一次文武鄉試中額各一名均自來

歲癸酉科爲始俾士林早沐

皇仁庶羣情益知觀感出自

逾格鴻慈除將捐輸銀數清冊咨部外理合恭摺具奏伏

乞

皇太后

皇上聖鑒訓示謹

奏

保薦丁彥臣摺

同治十二年正月二十六日

奏爲道員才猷卓著堪勝兩司之任謹列敘事蹟據實密保以備

簡擇恭摺仰祈

聖鑒事竊臣前欽奉

諭旨著於所屬道府中查明如有通達治體循聲卓著者卽出具切實考語據實密保並將該員才具短長分晰臚陳以備器使等因欽此當經欽遵將素所深知之現任候補各員開具事實專摺密陳在案惟查有山東遇缺題奏道丁彥臣一員才識開拓器局宏深溯查該道自同治元年以來隨同前撫臣譚廷襄辦理軍務所有勦撫事宜規

畫盡善深倚重之嗣前撫臣閻敬銘查悉該道明幹篤實適以軍務喫重糧饟奇窘特派提調軍需總局該道多方籌措不避勞怨出納謹嚴計自同治四五六七四年中東省軍費浩煩而其用度撙節實百倍於他省歷次報銷到部乃其明驗臣前次奏保各員時卽擬將該道事實陳奏因其適值交卸局務私意該道在局最久交涉銀錢款項極多必須深觀其隱微之地果能矚然不滓乃可信爲國家得人因於派員接辦局務後密飭將該道從前經手出入各案逐細稽考毫無虛飾益歎該道之公忠自矢始終一致迥非尋常才智之所及也至該道任事勇往臣於上年派辦侯家林引河見其獨排衆難鉅任力擔卒能行

符其言至今地方河工咸相欽服查該道爲守最優洵堪
兩司之任臣考察旣確不敢隱蔽謹列敘事蹟據實密陳
敬備

簡擇如日後才不適用

臣

甘欺罔之咎伏乞

皇太后

皇上聖鑒訓示謹

奏

查看河道城隍各工摺

同治十二年三月初八日

奏爲查看徒駭河道鄆城隍工運河湖隍辦理情形暨回省日期恭摺奏祈

聖鑒事竊臣於二月十三日出省查看上年挑修徒駭河工程及鄆城縣黃河隍工業經奏報在案起程後卽自武定惠民商河濟陽臨邑齊河等縣沿路查看徒駭河挑挖工程上下游尙屬一律深通坡水足資宣洩現仍飭各該州縣於間有高仰未能暢流之處隨時修濬復向茌平東阿東平繞至鄆城察看黃河去歲新修隍堰一百二十餘里幸皆一律完整惟大壩迤北劉家莊等三十餘里係大溜經臨險要之處現在隍堰雖極整齊廂修埽段亦俱完

固而伏秋大汛水勢增漲風力洶擊仍虞稍有疏失卽壩南溜勢雖緩而隄身長至九十餘里按段加修亦非易事臣當飭該縣傳集紳民曉以利害多方勸諭按沿河被淹較輕及未經被淹各村莊妥議出夫捐料預防搶護各紳民深知自衛身家尙屬樂從惟以東南一隅民力保護一百二十餘里長隄實屬力有不及緣頻年兵燹之後繼以黃流小民蓋藏早竭借貸無門疲憊難以言狀每多饔飧不給若以出力出料均責令兼辦恐致貽誤臣到工後據該紳民環懇籌發銀兩稍資津貼臣目擊困苦情形旣未便拘泥舊章亦不敢吝惜經費致誤事機伏維

聖主痾瘵在抱視民如傷值此捍禦黃河緊要之時斷不

忍以災歉餘黎重滋苦累當卽仰體

皇仁准其籌給已劄提充沂曹濟道庫銀一萬兩藩庫銀一萬兩委員按里酌量津貼俾該紳民等認真辦理以期保衛務於汛前將危險各處先期修築完固庶免臨時忙迫又由鄆城繞至濟甯查看應修運河南北兩岸殘缺隄工暨南旺等湖應修圈堰均於運道民田大有關繫已飭令署充沂曹濟道潘駿文運河道王化堂督同各該州縣衛趕緊切實估修稟辦卽於三月初三日回省沿途察看兩陽時若土膏滋潤麥苗芄茂民氣雍熙均堪仰慰宸廑爲此恭摺具陳伏乞

皇太后

皇上聖鑒謹

奏

估修石佛新店運隄片

同治十二年三月初八日

再上年三月閒河臣喬松年以運泲二屬漫水隄工奏准
動撥山東藩庫銀五萬兩當因堵築侯林大工修培鄆鉅
民堰司庫支款浩繁未能卽時籌解惟查濟甯以南運河
新店閘以下自咸豐初年豐工漫溢後隄岸衝缺河坡相
連嗣後船隻往來俱由坡湖繞走今新店閘以上運隄又
因侯工漫水亦多衝缺之處若不及時修辦恐將來措手
益難必致多糜工費且運水旁洩亦慮有礙漕行惟詢據
運河廳原估約銀二萬四五千兩爲數較多臣因現署充
沂曹濟道潘駿文素悉河務工程辦事結實當飭會同運
河道王化堂督飭營汛核實覆估以憑酌辦現據該道等

自新店開起石佛開迤北止擇要勘估計修築兩岸缺口
並將隄身卑薄之處加高培厚以資保護舊隄收蓄水勢
共估需土方銀一萬三千餘兩臣於此次由鄆城回省紆
道親至濟甯該處周歷查看該道等所估於節省之中仍
求慎重已飭趕緊興工務於南漕未至以前一律完竣並
嚴飭認真督辦不得稍涉草率至該廳原估其時候工甫
經堵合兩坡一片積水實屬無處取土現在經歷冬春積
水漸已消涸取土較前稍易又係擇要辦理故前後估數
不同除俟工程完竣再照估定丈尺驗收並將用過銀數
核實造報外所有估修石佛新店南北一帶殘缺運隄緣
由謹附片陳明伏乞

聖鑒訓示謹

奏

奏稿卷九

五

南旺湖工請免攤徵片

同治十二年三月三十日

再查東省運河西岸舊有南旺一湖地居濟甯嘉祥汶上臨清四州縣衛周圍修築圈隄復建立斗門十二所以注汶河西下之水並撤運河停積之沙關繫運道者甚重而湖西北數百里一帶民田當運河盛漲時尤恃一綫單隄藉資保護惟湖隄自道光二十八九年興築以後因迭遭兵燹經費難籌久未修理兼以同治九十兩年黃水由洪川口侯家林等處潰決衝開芒生閘直灌入湖以致圈隄悉遭衝缺而湖底受淤益形高仰既不能容納汶水於運河極爲有礙卽民田之淹浸亦日甚一日前據濟汶嘉臨各州縣衛稟請修復隄堰臣以該湖所關甚大且現值規

復河運自應亟圖整理當卽批飭該州縣衛切實勘估稟報核辦臣前由鄆城查看河隄後繞至汶上濟甯周歷查勘目擊四圍隄身悉成殘廢而湖心淤墊過高若不及時修築恐運道民田受害益深隨據濟甯等州縣各將所管界內應修工段估計前來共計約需銀三萬一千七百一十八兩七錢五分臣逐加確核較之道光年間所估有減無增尙無分毫浮冒惟查從前興修係先行藉帑辦理由民間分年攤徵歸還當經飭令各該州縣衛查照成案舉辦復據稟稱傳集沿湖各村莊紳民剴切勸諭該紳民等均以湖隄係保衛身家藉帑攤還自應遵辦第從前濟汶嘉臨各屬未經賊擾亦無水災民力尙爲充裕故攤徵稍

爲遲緩尙能清還現在地方迭遭兵燹十室九空又加以黃水改道漫淹十餘年之久田廬盡爲澤國生計毫無苦難言狀若再照案攤徵恐民力萬有不及將來有名無實徒滋拖累環聚泣求稟請籌款興修免其攤還等情臣詳查所稟係屬實情似應准其變通辦理以顧要工期於

國計民生兩有裨益惟司庫近日協撥過多支絀異常而此項工程又萬難姑待再四思維惟有於臨清關稅設法湊撥銀三萬一千七百一十八兩七錢五分委解交署充沂曹濟道潘駿文隨時支給並札飭督同認真修築以仰副我

皇上慎重運河之至意至此項銀兩攤徵歸還雖有成案

可循而今昔情形懸殊民力凋殘實甚相應籲懇

鴻慈逾格矜全俯准寬免財億萬窮黎感沐

聖恩永無暨極除俟工程報竣委員驗收再行核實造報
咨部核銷外所有修理南旺湖要工並籌款變通辦理請
免攤徵各緣由謹附片陳奏伏乞

聖鑒謹

奏